

讀

書

藝

語

讀書藝語卷之六

馮翊李元吉父慶父著

上谷金毓峒釋鶴父較

禮記

右旋其封且號者三三字承右旋言謂繞省其封者  
三周也非三號也或以爲季子於哀情爲不足者未  
是

公曰末之卜也謂卜之罪罪之末也所以責責父也  
明其爲罪之首也故責父死之卜之死不可知也或

以爲末者言其材用之末而不能濟戰又末卜不末  
孫而史載孫死不載卜皆互見也恐未然

裼裘襲裘曾子襲裘是已服吊服也子游裼裘是未  
具吊服也故曾子以子游爲失禮及主人旣小歛哭  
延賓子游始具吊服以入蓋所吊非有服之人自不  
必先具素服以襲嘗服也故曾子以子游爲是而自  
以爲過

曾子子貢入於廐蓋曾子等始欲吊喪入門而聞君  
在故避於廐中廐蓋門側之房非養馬之屋也及君

既吊而曾子等乃正容蓋具吊服也通名以入吊君  
及主人皆知曾子等之賢而禮之爾或以爲入到入  
家馬房裡又作甚模樣出來此蓋泥於廐字之誤而  
記者以盡飾行遠爲說遂令後人生議論矣

微子立行自是殷人弟及之禮文王立武王則伯邑  
考前爲紂所醢矣又無後故非廢長立幼也如太王  
傳王季也

孔子封防墓崇四尺以兩甚而崩當非一時之事記  
者偶記之一時遂令後人疑其不實以爲非聖人所

以盡心於葬者也不知四尺之高日久雨甚水大至而圻焉此聖人意料之不及者何足以病聖人哉非若不知父墓而殯母於衢之非聖人所爲也

死而不吊吊字疑當訓至謂不至其正命者有此三非謂吊喪也

史稱舜巡狩崩蒼梧之野余嘗疑之夫舜九十而讓禹使攝行天子之事則舜不復巡狩矣豈以百一十歲而復巡狩以崩蒼梧哉且巡狩以岳爲止有定所矣蒼梧在衡岳之南又巡狩之所不必往者哉則孟

子以舜終鳴條在河東去蒲阪近爲是矣九疑舜冢  
蓋南夷慕舜德而爲之冢以寓其敬如山海經稱西  
方之國禮軒轅之丘之類也其云二妃死湘中亦因  
爲舜冢而設二妃位於君山耳

顏子之喪至祥已二年矣夫子之御琴瑟亦久矣其  
饋祥內而彈琴也蓋偶然耳或以爲夫子不忘哀而  
琴或以爲以琴散其哀傷皆未然

子游麻經就臣位以譏惠子之立庶然紀事不言立  
庶之事惟文子扶適子南面耳

伯玉請前之言蓋戲文子言子欲葬此則我當前子而葬此耳以示不必樂也非前行而去之也

夫子將之荆而使二子繼往觀之蓋觀其治亂如不居不入之意或以爲觀可仕與否而謀可處之位非也

子思吾何慎之語謂已無財又無時則禮不可行矣將於何事致慎乎

矯固齊衰而問季孫之疾自以爲士公所說衰之禮矣武子亦善其能明禮之微矣然使以三年之衰

則喪無外事吊且不可而况問疾以期功之衰則固  
可易服也而可衰乎固亦未爲得禮也

侵陳章當作陳行人儀使於師夫差使大宰嚭問之  
爲是此記者之誤

萬乃舞之摠名執干戚者爲武執羽籥者爲文皆無  
聲也吹籥則在堂上非舞人也左傳振萬舞必兼二  
舞以誘息媯而夫人以爲先君習戎備是獨舉武舞  
言爾非萬專爲武也

以人母嘗巧則豈不得謂以人之母葬試汝之巧則



豈不適汝意若以爾母嘗巧無乃疚於心乎或以爲豈不得已或以爲豈不得以爾母試巧作一句俱未妥

邑長葬妻而偶犯人之禾甚微事矣固不必庚也其云買道後葬爲難繼亦有旨或以爲不仁不恕殆亦未之省此乎若果害人之甚子羔自將庚之不待人言矣

百祀之木謂百年之木其木巨而可爲棺槨也不至者木不至也廢祀者不及百年之小木也以天子之

喪而虞人不用命如此故有嘗刑矣然虞人非一人亦不必盡命之致木舊說是也出舍公館以待事謂待君更爲尸之命也非待祭畢也

命曰暢月謂作土功以暢達其月之氣故有此灾非以爲月之名如玄月之謂也

吾與爾三說者不善會其意遂謂文王減已年以與武無是也蓋文王演易而知已之年不及百武王之年過九十故曰我以盈則百爾以盈則止當數九十年然足十年則我與爾分之爾得三焉故下文各記二

王之壽以終之非謂減已以與子也

胥鼓南蓋鼓二南之節也教世子而以南夷之樂鼓  
無乃非禮乎

三而一有者三卽上德事言也有一而止進其等與  
其同儕序者曲藝非朝廷可用之人卽其德亦僅性  
資之稍近乎德者非學士之成德也故止爲郊人而  
不得與於成均及取乎於上尊也以爲亦得取堂上  
之尊以相酬勸以榮之者未是

祝以孝告謂祝之告神必曰孝孫薦其嘗事是也嘏

以慈告如賜祚於主人曰來汝孝孫是神之慈也  
升中享帝而致祥瑞休徵亦言其理可以致之然耳  
必欲求祥與休徵則非矣

請肄簡諒謂童子請業於師當簡語誠實也非習爲  
簡諒也

曰而不出卽博學而不敢教人之謂也非不爲人謀  
也

博學無方方謂方所當學卽學不專一端也孫友親  
志疑當作遜志親友或誤也

士大夫子旬而見旬疑當爲旬隨意欲見則見之也  
非若國君則當以禮進見之也

虞祔之枕不入室升堂蓋祭畢則歸倚廬故耳未必  
殺衰若殺衰豈舍枕而入堂室哉

聲淮及商以爲貪商之聲則其樂皆叙克商之事卽  
不貪何得不及商以爲商聲之長則咏嘆淮洙之固  
自長也何得於商聲而不長要之貪之說爲稍長  
士服大夫之服異非衰經之類蓋衰之下所着衣有  
精粗之不同若衰則自天子達庶人矣

士之子爲大夫其父母弗能主者古人三十始娶四十始仕爲大夫以年計則子爲大夫時父已七十餘矣故弗能爲之主以老也七十尚許飲酒食肉於父母之喪豈可爲子喪備禮哉石梁不細計士之子也父之年而直以爲父不得子齊東野人之語余以爲過矣

大宗人小宗人非大宗伯小宗自是宗伯之屬官耳以爲都宗家宗或亦未然

其贈也拜當以贈制帛送死者始稽顙爲是

一溢米謂二十四分升之一則四勺也日食不及一合所以杖而後能起

祭日以朝及闇非一朝闇二時祭也以朝而及其尚闇則天色正赤故用以祭耳夏氏祭闇謂日未出而尚黑之時非昏時之闇也凡祭皆以早無以昏者惟祭厲夕月乃以暮

求仁者之粟以祀此不可解註亦無解意止謂自己盡心竭力以得之粟也

大王之道謂行三敬足以及天下是道大而爲王者

之道也或不指大王一人

事天如親事親如天摠之不過乎理之當盡而已故曰不過乎物謂之成身

臣儀行不重辭數句謂臣之行但取可儀則而已不重辭說故不必高爲之說如已所不能企及不必煩爲之說如已所不能明知則君不煩察已而不勞未必爲君之不及不知也

不可面數蓋微諷之卽改不容俟乎面數耳蓋以勇於改過爲剛毅也



孚尹旁達升菴辨孚爲萃尹爲筠言其潔白如葭萃  
竹筠而又旁達於全體是爲信也可從

年長以倍陳氏無解余意當以三十年論長蓋彼長  
於我三十年則前一世之人與父同行者也故以父  
事之而止長我十年者則同世而爲兄行者矣故兄  
事之

上東堦先右上西先左足蓋主在東而先右足則身  
得少側而向西客在西而先左則身得少側而向東  
主與賓各以相向爲致敬也不止順入門之左右已

也此亦御婦人前左手御國君前右手之意也  
大夫強而君殺之義也與上下文不相蒙余意此殺  
字當讀爲衰殺之殺去聲義當爲意之訛言大夫之  
享君以大夫強而君衰殺之意故爾在魯則自三桓  
之強始也如此則上下文義通矣註中殺叔牙慶父  
時三桓固未立也非強也如後強盛則昭哀欲殺之  
去之而不可得矣

相貴以等言相尊貴以班列之上下也如春秋時所  
謂霸者以意之向背爲升降諸侯以勢之強弱爲上

言三曰言  
下者是也

羅氏致鹿與女註以爲亡國之女或未然此蓋淫奔  
被罪幽閉之女以此等女致戒於諸侯使其不淫女  
色也

讀書嚙語卷之七

馮翊李元吉允慶父著

上谷金毓峒釋鶴父較

左傳

莊公寤生驚姜氏或以爲寤寐而子生若是則生之甚易曷驚之有風俗通謂生而不開目視若生而活但不開目亦何必驚寤生者今俗謂之草溲生而不哭啼亦有無鼻息者收生者以口鼻息噓之或以兒臍置口中引之則哭啼如嘗兒矣然往往多不救者

故驚而惡之也

莊公自斃自及將崩之言蓋知段必襲鄭故欲待其發而討之也而祭足子封皆欲速除之無以天倫友愛之道啓公者以此知考叔之勝仲與呂也

莊公悔其絕母而黃泉之誓已出不可返故雖悔而不肯迎母歸也考叔以掘地一言實莊公之誓故從之甚速也或以爲君子無取也亦未之深思矣

命名嘗事耳而師服以爲兆亂名何足以兆亂也但兄曰仇止于結仇耳而弟曰成師則能成其衆矣雖

非兆亂而弟立兄替爲之讖矣卜偃之倫畢萬而曰以盈從大名其後必大也亦以讖語兆之耳未可非也

豕人立謂立如人也或卽謂作人非也徒人費曰奚御言我何御君之爲或以爲禦寇亦失之矣費實襄公御車之人非車下徒行者

莊公之子八人杜謂不見傳記然語之來盟亦一人也其後爲子人氏

敬仲之卜曰五世其昌八世莫京其筮曰在異國在

其子孫又曰異國必姜姓與夫諸占之不爽者或以爲好事者附會之也余意不然善乎穆考功之言曰二百四十年之久列國之衆其中者僅此見于傳之事則其言之不中者不知其幾矣人或以左氏爲誣余以爲非誣也

狄之廣莫數語或以爲使百姓稱之也其說甚善但上文無啓土之意百姓何以稱其啓土乎或二五復言之如杜說未可知也

將下軍也土爲知太子之不得立伐臯落也獻公明

言未知誰立惜乎里克不勸太子逃之而但言當孝也姬氏豈以申生不孝而陷害之哉然狐突子養罕夷丹木皆謂當逃而太子弗用其言乃欲用羊舌之說太子亦無見幾之明矣

是服也狂夫阻之或以爲備阻以狂夫指獻公也或以爲阻者疑也以爲狂夫亦疑之也乃阻無疑訓而臣以狂夫目君恐未必然曾見他本阻作詛以爲是奇異之服乃狂人詛之欲盡敵之服也故公以此衣太子亦使其盡敵也似乎可通



輔車脣齒之說或以爲車輔爲車之有輔也昔人云  
方言車而遽及脣齒不倫也輔乃口輔車乃牙牀卽  
脣齒也此說得之

東畧之不知數句或以爲桓公東畧未可知西則不  
能再也余意不然卽使桓不再西何遽在亂而又曰  
晉君務請亂也蓋宰孔知晉之將有亂故謂晉侯如  
葵丘是東畧也但念在東畧而不顧西則否矣其晉  
將在亂乎君姑歸而請亂無勤此行也九月而獻公  
卒亂者數世文公立方平孔信有先見哉

狐突妖夢或以爲申生安于一死決無爲厲余意未然申生以世子被譖冤死原無求伸冤自明之意而惠公改葬贈諡非其欲矣且惠多行無禮故申生請帝而罰之申生冤死其氣故應未散耳

慶鄭怨公之復諫違卜故不欲救公而去之然而又以君之在難也故使虢射等救公而遂誤其執秦伯又不料秦之遂獲晉侯也故于晉侯之來寧待死而不逃蓋悔之也其情亦可悲矣

次睢之社當讀作咨起蓋憚其神而不敢行之說也

若以爲水次則何不曰睢次之社而曰次睢也

焚巫尪蓋使之祈雨而不得故欲焚之如後世之請雨不得而自焚者也以爲二人又以爲天惡尪形又以爲天閔尪病故不雨者皆非也檀弓縣子對穆公之言則以巫與尪明爲兩人矣此傳聞前世之事而未知傳之者之誤也

滕稱侯矣已而稱子杞薛稱侯矣已而稱伯或子或以爲時王所黜胡文定曰時王能黜諸侯春秋何必作也杞之稱子猶間有之以爲一時行夷禮也滕之

稱子有以爲在喪文定曰終春秋之世不復稱侯無說矣然文定以滕爲黨惡也若人以終春秋不復難文定將亦不能爲之解矣余意滕薛杞小國也苦于強令征賦無藝故自貶其稱或降一等作次國或降二等作小國圖稍輕其征賦耳正如戰國時衛之自貶稱君類也

殺懷公于高梁左傳無明言誰使殺者王荊石以爲文公決不殺也余意此必狐毛輩報父仇而殺之不則秦兵使人殺以定文公也不則晉衆自以戴文故

除懷公也

介推非不願食祿于朝者特憾狐趙諸人之矜功而受厚賞使文公之忘已故發上下相蒙之怨言而遂隱以死也使諸人不競功而聽文公之以才用也推立朝矣距躍以足跟跳躍也曲踊蓋曲足指而上跳踊也三百數也魏犢勇士以此自明其傷之輕耳蓋以公使視之傷果病則殺故以此自見也

風于澤遇大風于水澤之所也遇風當收旗幟而失于收故爲風裂而吹去以失大旆之左旆也若以爲

牝牡相誘之故則方駕車時不得相誘已休乘時旌  
幟俱倦矣安得亡其旃哉時俗好新浪說至此卽書  
馬牛其風余以爲馬牛奔馳如風而出營之外在營  
伍者不得離伍遠逐而在營外者收之則當復其原  
所也傳風馬牛不相及余以爲南海北海相去之遠  
卽馬牛奔馳如風而亦不相及齊何爲而伐我哉此  
二言亦非牝牡相誘之說也杜氏不作此解何近人  
之鄙穢乃爾

出姜之不允良不以貴聘而賤逆但逆以賤是文不

重其偶故出姜無威而敬嬴得以私事襄仲而殺適以立宣也齊昭之子舍不立傳謂叔姬無寵舍無威之故殆與出姜之事同矣

繞朝贈策楊升菴以爲簡書者得之或以爲朝欲歸士會而言之不行故贈鞭非也

喪之帷堂以遮蔽婦女也聲已不視帷堂則其去殯遠矣蓋怨之深也

十六才子非必高陽高辛之親子蓋其同受氏之人子也止舉主后主布五教二職而不及其他者史克

爲文之體蓋不欲煩多其言耳

鄭穆刈蘭而卒謂冬月霜嚴蘭枯當刈已必于是時  
卒也非自刈也

實言必長晉國謂樂書得實行其言必爲晉國之長  
言其言之善可重用也

楚子又求成而復使致師以晉之對使之辭不一恐  
見欺耳

甚當如杜訓教此楚人蓋隨晉軍中者故晉人旣免  
難而戲之以數奔也以爲毒害者未是



逢大夫非不慈其二子也蓋楚追急迫既見趙旃則不得不救又載趙旃則車重難奔不能兼濟故不得已下其二子而言尸汝木下也次日尋尸而二子果俱戰死此木下則楚追之急迫可見而二子與趙旃之不能兼濟可知矣

反正爲乏古篆反正從一下少一子少故乏也近人乃以真書正字而反之非是

並轡援枹或以爲卻克左右手也若是則張侯安往蓋克與張兩傷故並轡而使車右援枹以鼓也

敝邑之幸四句蓋言先幸未敗尚欲從晉以兵今不幸兵敗求和不得敢不唯命背城一戰也

或稱夏姬雞皮三少考傳稱姬子貉之妹子貉卽靈公傳稱早弑無後則夏姬此時不過二十許爾其嫁巫臣在成元年度姬不過三十余無惑其生女而配叔向也後再無見三少之說未必然

文公報楚許退三舍君則制命故也鑒則臣也臣無自尊故止言盡忠致死自是不同

養之以福升菴以下句正之爲是蓋能敬以脩其動

作禮義則能養其所受之中而動與福會也不能則反是

衆繁從余三年蓋聲伯謂凶夢已三年是非死徵也故占之是暮而卒卽夢之凶兆在于此耳以爲凶夢散在衆人者非是

怨其君疾其大夫良霄卽不以此亂鄭而不免與子皙爲難以亂鄭與言爲之兆矣

馬首欲東欒黶之不奉令若此使耻于逃楚時知武子亦不能行令幾何而不爲郟之敗也且又欲殺土

鞅何其肆志若是死于牖下幸矣

左氏以尹它學射于庾差而孟子以庾學射于尹何不同如是母乃孟子時傳之之訛耶

右師短策自悔不逐華臣爲謀之不遠耶非爲短鞭也駕車者長鞭便于策馬故蔡謨戲王導曰有長柄麈尾豈爲短鞭于駟車哉

姑姊妻之姑姊蓋姑之女于公爲姊者一人也或云姑姊分位不同豈可同室而事夫也不知嫡夫人行則姪姊從之二國勝之亦然姊與姪卽姑姊之位也

何以同事君乎然武仲云以姬氏妻則亦或果姑姊  
二人也

樂盈多士與齊莊之好勇士同途一逐一弑其士皆  
死此亦勇士之一阨也夫

爲隣國闕闕蓋闕文也左氏必言爲隣徹樂而况母  
有喪可不徹樂乎而闕其文後人或誤寫作正取

子無咎言我因子舉事縱死乃我不爲天佑不以咎  
子也以爲子無天咎者未然

攝車從之宣子奉公不出而執攝宣子戎車以從敵

也免之當爲勉字之誤也否則謂樂汝不必免我我死亦訟女于天蓋以死自誓耳非求樂免已也

厲之不如言厲鬼尚不辟人而孫蒯乃避殖綽是不如厲鬼也或以厲指綽者非是

所謂不能謂宋不能用刑賞也非不能用其材也倍楚言晉因宋以守二國致死于敵雖謂力倍于楚可也非謂楚倍力猶不勝也

辟諸大墓蓋崔明藏于墓間以辟禍也非啓先人之墓以藏杼尸也

慶封易內蓋封以內遷于盧蒲氏嬖亦以內遷于慶氏也未必以妻妾交易如晉之祁勝鄔臧所爲也不尚取之夫人責平公不治叔齊之取貨故云先君有知不庶其取齊而治之乎

絳人能數甲子而云不知紀年豈真不知哉直是難當時疑年使年之人耳史趙以一亥字該其日數亦奇語

后子適晉以車千乘蓋景公憚后子之逼而又以母故不敢殺故聽其去國而以千乘送之行仍聽其八

迓取酬幣于雍也或以爲左氏之浮誇語是未深思  
當日景象耳

五稔之說叔向以伯有侈汰故言不及五謂其禍之  
近也后子以秦伯獲天贄故言鮮不五謂其尚可延  
也五者大約之說耳或以叔向爲鑒或謂秦伯恃天  
贄而驕皆未然

庚宗婦人事穆叔避難微服以出故求婦人使爲食  
而寓一宿焉未必與婦人通也婦人哭送乃憫穆叔  
去國而然耳若果以私通而哭而問其姓則豎牛乃



穆叔之長子矣豈止爲豎已乎

孟仲之年皆長矣夫豈不能自請享期自示珮環而必托之牛俾得行其奸也縱云以母故失愛然叔孫旣遁以來夫豈不當朝夕父側而自外也亦愚哉亂大從謂行事皆從于亂也以爲亂嫡庶大順之道未然

楚虜雖橫猶悼人之強故啓疆盛稱晉之強以恐之而免韓宣叔向于辱

有虞于子虞意料也蓋料子產之才德將大有作爲

以興鄭而制謗政刑辟則無大作爲矣故曰今則已矣

盜有寵句楚子謂我不寵盜如紂爲逋逃主也若盜果爲我寵則汝未可得取于宮中也無蘊滋長言不蓄利以生妖害則人之福澤可以滋長非益其利也

摩厲以漬二句言我之應王如嚮乃厲刃以待王之聞出可乘而後斬其邪心也非謂王入視威權而待其出也

固城杜訓堅固之城得之非邑名也

無爲爲善謂無與共爲善也子皮授子產政而曰虎  
帥以聽誰敢不從今子皮亾故曰無爲無與共爲善  
也非無緣也

不狎鄙謂我不習與鄙夫爭射也抽矢豹旣射而又  
抽其矢也故城乘間射殺之非謂城與豹言責其爲  
鄙夫而豹止不射也

亢不衷亢宗二亢一訓蔽一訓高余以爲以庇訓爲  
勝謂庇其宗庇不善之人也

鷄憚爲人用數句謂鷄因憚爲人用人則異于是若

人果爲人用則無能害者矣故使別人用則事有難處若已果爲用則何害犧謂太子已指子朝人指子猛等也

曲直以赴禮謂人能抑其傲忽勉其怠弛或俯而就或企而及禮也非性有曲直也

母老子弱無若我何以爲囑老弱于先亦通余意此專諸謂王僚母老子弱不能爲已患之語耳蓋諸未必能料鉞之交胸也故不曰無我若何而曰無若我何

宰獻請安余以爲飲酒必齊侯先獻而公酢今使宰獻而請賓主安坐言簡禮也

祁勝鄔臧通室敗俗之人法所當加乃以苟躒一賂而祁氏羊舌氏以始禍滅宗不但晉之濫刑可恨而勝也錢真通神矣

官宿其業不但謂安職謂世脩其職而宿習之則其物亦其習而可來也

士鞅取貨于季孫而苟躒亦爲始歸祭之語則季之貨行不止鞅也明矣以爲墮計不悟未是

焚焉還卒焚自是以火田卒自是病卒或以爲被火焚以卒未是

吳人求楚子于隨不獲而退亦子胥不敵後嗣之意耳使其逞兵力隨安能支

包胥哭秦庭者七日夜夫人七日不納穀氣卽死况加以哭乎包胥異人哉

敗步敗王步卽履也不履君位則不佩君王非行步也

五父之衢魯之城外而虎敢止舍其心中無魯人可

知矣故曰喜于徵死何暇追徵死謂魯人喜于免戰  
亡之死而相徵召爲樂之不暇也猶董卓誅市人皆  
沽酒爲樂之意非謂喜其免于徵召以死也

如騶之斬斬駕馬之勒也馬行則勒與同行是斬隨  
馬非馬隨斬也蓋猛與書息而白謂先登故書收歛  
其衣甲而與之辨言曩以登城爲難而今又以論功  
爲難以非欲擊猛故猛笑而曰吾從子云云也

齊侯欲衛侯同乘車故方同晏飲而預備兵車使人  
告有晉兵乃與衛侯同車而馳出赴戰又使人告無

兵乃止此兒戲之態耳非所與論于兵法也

三折肱言病至三次折其肱也

吳師屬目蓋行列前後爭注目以觀越人自剄則陳動矣故爲越所敗也

不屬非魯人言魯人重義急君若背城以戰而群室不聯屬以出則不可稱爲魯人矣故欲以一室敵一車也

人尋約吳髮短蓋言將致死于吳而吳人短髮不可斷以貫首故具繩以聽吳人之貫已首也非謂已勝



吳而欲以繩貫吳首也

放經蓋季氏不繞放經而與孔子拜非孔子放經而後拜也

黃池之會吳讓晉先可信蓋觀吳將以公見晉可知也國語之說或吳人之語未可信也

不敢問故謂不敢問魯有事小邾之故也非欲言之故也

衡流方羊喬焉魚之將死無力濡困之狀也

讀書藝語卷之八

馮翊李元吉允慶父著

上谷金毓峒釋鶴父較

國語

王幾頓乎幾訓近頓訓罷言王勤民而觀兵於遠所  
謂疲中國以事外夷兵玩而無震者也蓋與起句爲  
相應

柳子厚以媚於神求福用民爲巫之太而非之然而  
未允也媚訓順所謂媚茲一人是也凡人以誠事神

自能致福盖事神誠則行事必不敢違理逆民自爾  
福至不藉千畝則無事神之誠矣克是心也將慢神  
而虐民矣何福之有

宣王料民盖閔之以克征繕是謂加賦非伍兩軍師  
之政也是謂害於政且非所以訓後嗣也故曰妨於  
後所謂作法於貪弊將若何也幽王繼之恣其暗虐  
以亾是妨嗣之驗也子厚非之未是

丹朱爲神房后爲馮是皆不可曉者且神降於莘而  
以爲必丹朱又不可曉也且虢君夢神立於西策史

以爲辱收也且安知此神之非辱收而以爲丹朱乎  
不庭謂諸侯背叛不朝王庭者也見書經中不訓直  
也

晉文請隧賈以爲掘地常以爲六隧以死生服物觀  
之賈說似勝應且憎以非余一人應平聲言雖以隧  
賞晉且當憎其廢天子之章耳以爲受者未允縮取  
備物縮訓直言晉果爲天子直取此備物以葬則可  
也以爲引取似迂矣

有優二語謂民農事畢則優逸而竭力罷敝於工役

也謂陳不脩農功而勤民築臺於夏氏也

二君三君之說柳子厚非之然劉康公之意以魯宣仲之立已能容歸父後人將不能容也二人猶或可同心能容宣叔三人則人各有心恐不能容矣是以理言之未可非也

邱敬子請以班徒次則自上達下當徙者多矣故公亦弗取敬子非自以爲罪如孟文子也

用善不肯勸君用善君不從也專則不能民專爲善則不能自全也是以至於殄滅而君隨以殺也

誰繇已貳言楚臣方任君政誰肯懷疑貳之心而不  
爲君求說侮也非諸侯貳也故下云說侮不懦言欲  
爲君說侮必不懷怯懦之心執政皆不疑貳以楚之  
大而難魯誰能待之也

君子患作謂創始也不衷謂不善也導之言人將效  
之也

罷士二句言人皆爲善而爲無行之士女無所容也  
征不旅舊旅當訓循言隨歲之豐凶而征之不循舊  
之豐而責凶之盈不以舊之歉而督豐之補則民安

其業而偷生苟免也以爲不以故舊爲師旅者未是管子不以都鄙爲軍征也

魯衛不近海而言海謂水所聚也渠弭水所流也海有蔽則軍不陷澤中渠弭表其渚之淺處則軍利涉環山有牢軍行依高爲營有牢則可就而饗馬牛也如是則可以爲地主入矣

待於曲沃言已以死教人臣忠於君是待曲沃之厚也

苟可以離數語言人心苟可以離彼將入以耳言離

之一受其耳言將逞其意何而不知其爲害矣何可止之也

雖謂之挾數語言雖挾骨猾以牙齒然皆在口中弗能傷口故無大患也口弗堪謂骨不勝口非口不勝也

隸農農人之隸也隸勤易沃田比其入也農則收之隸豈能獨享哉

速縣二字難解余意當爲速督諸縣邑之治耳註謂疾縊死恐未然



里丕荀息三人之言息從君於昏鄙哉丕之言正矣  
里克欲靜豈待施之言而後中立哉使三人皆知丕  
鄭以保護太子申生獻雖惑亦奈之何

左之謂降下之也如今以貶官爲左遷之謂非外之  
也

申生前欲順所安此又患不從是專欲從親之命爲  
孝也宜其陷父於惡而不能爲吳太伯也且申生之  
不能爲吳太伯夫人知之然爲太伯豈必如其至德  
卽重耳夷吾之逃亦奚不可而必坐以待譖乎

言無郵謂無過固可余意當爲繇字古通用言已優  
無繇進言於克故求從飲酒也

肅氏訓吾吾爲魚魚不敢自親按漢橫吹曲朱鷺魚  
小雅解者謂朱鷺之容安舒閑雅則此吾吾亦謂里  
克暇豫而安舒耳似非不敢自親也下自言其不能  
擇所事耳

秉率也奉君以殺太子所不忍通復謂洩君謀以交  
太子恐君怒而不敢爲故欲中立乞免也  
何可敗言不能疏其意携其黨變其志也

丕鄭之言卽苟息之見從君於昏者矣利害之際人之不能固其節乃如此可爲太息

殺君爲廉言已執方正以諫君使君減殺其威則是自大其方正而以制君之父子也故不敢若屈已志以從君廢申生立奚齊則又不肯爲明已之中立也廢人人指申生成人人謂奚齊也

讒人陷害太子已不能蚤見預圖免難是均是惡也申生惡君之言何其不思也以逃爲章君惡然則死之使君爲信讒殺子之惡惡不尤彰乎然申生至此

逃與死皆彰君之惡不若逃於將下軍士薦陳謀之日也觀此乃知太伯至德良不可及已

狄晉異境故不通晉數伐狄故多怨嗟夫今之犯重辟而卽夷者皆子犯之見矣

驪姬懼十一字爲句言姬懼子之求援於秦以自存

秦將助子爲奚齊患故且告悔告悔則是已無罪也

荀息之圖虞虢何其智也至傳奚齊則無它策而止以一死塞責何其拙也故胡文定云父非所子而子之莫能使人之亦子也息蓋有見於國人之不附奚

齊歟

共世子縊於獻公二十一年改葬以惠公元年已經  
六年矣肌肉當化而何以有臭蓋含冤憤而死意者  
必有不卽腐朽者乎國人有見乎此故爲誦曰貞之  
無報言世子以孝爲貞而反被讒以死是無報也不  
然豈以如是之人而有此臭乎惟其貞信不見聽誠  
而被以大戮又不肯偷生而不就義以喪大命故  
今日如是耳解者以內傳夷吾無禮之言謂共世子  
以惠公無禮而不受其正禮之葬然則不更厥貞之

語將何以解之

禍作亂也無斃當死而未殺求免其死乃作亂耳若是死而去國不處是不能作亂在國而罪不至死必不肯作亂矣故曰以禍而違誰能君出

若無天語言晉背德如是若果無天道勝負不可言若猶有天道則我必勝之矣

曹不明也言已出奔得志而使君失刑若不明知有罪然是逆君也

不降降字難解當作忤訓方通言報德則不與秦忤

雖忤而聽諫與糴則不戰也然而降無忤解

可以戾言暫止也止久將底則是定居也定居則是  
附著淹滯久安而不復他圖故曰誰能興之

謀而無正言桓卽有謀無可取正之人故必思始初  
時而求善也厭近習之無正必求諸遠故遠人入從  
之不爲過也

觀姜氏勸晉文之言可謂賢矣其有鷄鳴之風歟然  
而不爲晉文夫人何也豈文也厭其遣已而遂棄之  
也歟

乃能威民非上以威加民也民自以威相儆也胡蚺懷曰去威遠言不知畏也

方之青陽夷鼓皆爲己姓而可云青陽蒼林同爲姬姓何其不相應也豈青陽氏有二人乎抑二姓乎是子子指晉文也言晉文將爲長霸諸侯不專在己也

自下脫三字盖文公乘驛自卑下微服而得脫以無秦伯也註以會字連脫爲潛逃未允

甯羸之不從陽處父也盖內傳以爲陽子之不沉潛



也而此以爲陽子兒濟而言匱然則陽處父其有君子之容而無其德者乎

使人以乘車於行蓋趙孟故使之也觀下文吾故以是觀汝可知矣獻子之戮之也無乃微知趙孟之心乎霸臣之舉動往往若是

愁御人愁嘗訓勞御人侍御之人也以爲願以此報婦人之笑誤齊侯如晉必不隨以婦人

委身徒退二句言公將奪大夫曰臣下之肯空退以田與人者能有幾人言公必殺鄉大夫也其產將害

大猶之其爲害將大耳言君殺大夫鄉而奪之田臣  
或亦作亂以逆君其禍甚大也非謂害大臣也  
記伐鄭戰鄆陵范文子不欲之言凡四而皆不同豈  
三四次言之乎抑三四人傳聞之語也至於刀鉞斧  
鉞之說又何戾也厲公一日而尸三郤豈非斧鉞之  
刑乎何益於敗  
平公患亂兵不止而陽畢專欲滅欒氏畢蓋范宣之  
黨也何不并中行氏而言之乎

欒氏之亡董叔之紡皆范氏之女爲之巨室之女不

可近如此故曰娶婦當不如吾家者

非德不當雍言無德則雖有福祿而不能任不得爲雍和也雍和則不爲幸福明已之幸也故懼本無難解而驟觀若不知所謂

誰不可喜二句言與人交善無不足喜者交惡無不足懼者故言微物害人以證之

不德而賂言已德不脩而但縱嗜欲也乃地也當無事時但求足吾嗜欲以求利於吾今在危難之中必不能盡心於我與我同死故不可使也

婦人不帟而諫之蓋不着下裳露其褻衣以厭勝之故褻化龜而走去也

屈建去芟柳子非之是可非也芟邊寔也若何去之卽拘於數去他一品而薦芟猶可去之逆親矣  
不居謂見任使不止安居也東陽蓋卽東陵其盜謂蹠也蹠非此時人但借言大盜者耳

天咫咫步也言申無宇但曉天文耳不習於治民也抑內傳謂四國而此云三城不可曉也

左執魁中二句言已於鬼事尙知之矣何有於人事

以拒其諫也

土氣奮收言土氣下降也百加備舍言百姓盡蓋藏也群神頻行神氣將隨天氣上升也註以爲並行求食鬼神無形聲何知求食乎

上下悅乎鬼神數句子厚非之以左史爲巫之大者余意未然夫悅乎鬼神者以誠事神也事神誠而順其欲則必不敢爲慢神虐民之事矣神又何怨痛之有此理之正者未可非也

自壽自終其壽也非自保之謂

不居謂不肯安其所居之位也職主也主受此禍也  
不違乃違言人以吳王爲不可與言而惟令之從是  
棄之於危亾也故云乃違又云亾之階

有以取之謂有可取而後取之也有以棄之謂有可  
棄而後棄之也取可取故能持盈棄可棄故能救傾  
不謂克楚失楚危事數語言人不能行危以求安致  
死以求生則何所用智乎

有遷謂去國近則士無必死之志將逃生也吳去國  
遠不可卽至驅之致死必無變易之心也

將不長弟二語謂晉不循長幼之次而恃力以爭競  
爲長於吳魯諸國也征非攻伐之謂故下云欲守先  
君之班爵卽內傳所謂於周室爲長之說也

無以待危言莫待危急而後從之也按內傳趙鞅欲  
致死爭先而司馬寅勸令姑待之乃先晉人是晉以  
持久挫吳也此語或吳之說士自爲之以爲王孫雱  
延譽耳不然吳能壓壘晉旣飭壘矣樂書固壘之謀  
晉舊志也豈其不能舉而行之哉僭王之說管仲尚  
不能以責楚趙鞅豈能以責吳皆飾說也

乃必有偶言一人致死有如二人五千人是萬人死戰也事君指戰鬪卽與君周旋之謂故曰毋乃傷王所愛

先一飯蓋古禮長者先飯而少者乃飯卽內傳孤老不能事君之謂也

貳言謂范蠡兩次進之言也註失之解骨卽解體之謂何用多說

馳騁六言示不圖具以誤之所謂人事當盡者也肆遂也非放肆之謂放肆則忘國常矣



月盈而匡匡無虧訓或古匡字之別乃可言虧

後則用陰然不可爲陰蔽陰蔽者怠緩而不知乘機也先則用陽然不可爲陽察陽察者輕疾而不可繼使敵人知吾氣之竭也盡其陽節三語卽長勺之戰齊人三鼓已休曹劌乃鼓而敗之是也

子往數語蓋雒欲反見越王蠡言子往吳矣若見越王將殺雒是執事者得罪於雒也

國語一書記外國國語也乃齊止記桓仲鄭止記遷新鄭一事至宋衛陳蔡曹滕等國畢無一語記之何

其寥寥也吳越之語止記越報怨一事耳一而足矣  
乃爲三焉何喋喋也越語之下似乎單爲范蠡作傳  
者然而列國諸賢如晏嬰子產華元向戌等亦多矣  
盡無記焉令人不滿云

詢於八虞註以爲周之八士而曰皆在虞官余以爲  
非也虞人掌苑囿之官耳安得此於二虢而詢咨之  
此八虞蓋虞仲之後而文王之從弟或姪也故與虢  
對稱舉之耳魯論載周之八士而不言其誰氏之子  
則其爲周之宗室可知也汲冢書稱武王命南宮百

達及南宮忽發鹿臺之財等語楊升庵以爲百達卽  
伯達忽卽仲忽而十亂之南宮括卽伯适也得非仲  
雍之世居於南宮而遂以爲氏乎然則或以爲成王  
宣王時人者皆未確也

讀書嚶語卷之九

馮翊李元吉允慶父著

上谷金毓峒釋鶴父較

戰國策

吳氏考東西周君之封甚詳矣然周王封臣而不嫌與周同號蓋本之周公輔成王之故事者也春秋時宰孔稱周公亦此意也

楚使司馬翦立公子咎左成說之齊使司馬悍立最左尚說之鮑氏以爲一人一事也余意二國欲立之

言三  
人不同恐自是二事而傳司馬氏與左姓或誤耳左  
成欲去展空二人而曰王類欲令若爲太子類似也  
又云悍士居中不便於相國而相國亦使爲太子讒  
人之說耳爲猶輔佐之

折而不賣鮑氏折劍之鮮爲勝蓋忿詞未必折之也  
必無獨知言世無識者但當獨知耳下文自說周君  
厚最以示人使天下信之庶齊不疑周之巧詐耳何  
不通之有

頗率止齊取鼎事誠如小兒之見然齊之取鼎其自

無路可通八十一萬之說深示其難耳非妄也

蘇厲爲周最章不可通余意君不如或當爲欲字故必怒上或有齊字蓋欲最之合齊也下若因最之事謂因最以合齊之事非本欲合魏趙也

謂周最曰仇赫章前段言赫之反覆無信下勸韓魏兼相周最以明固結於齊不可離則秦趙皆爭交韓魏矣蓋周最厚齊而韓魏兼以爲相則三國交固也趙難齊戰章王不去周最不上當有何或不下當有如字則意明白下云收齊而又以兵急之者秦駘魏

以伐齊魏陰合齊而陽以兵急之則秦齊俱不恨魏故伐齊不必因事執言也

齊魏祝弗外章齊相呂禮欲取秦以伐趙也趙恐秦齊合而伐已故先以兵攻齊天下見齊之附秦皆爭趨秦則秦必援趙以伐齊無安處不動之事也是用祝弗動天下之兵之理也

金授二章皆勸趙合齊耳負令秦與強齊占負任也猶所謂抱負之意後文專言趙占齊之失計

式於政四句式當訓法言取法者在政在廊廟之計

議不在勇與四郊之外也

計有一二謂料事明如數一二則不悖聽無失本末  
謂聽人謀而審本末先後者則人難惑之也

種樹四句似亦未爲舛蓋樹不得其處或妨於人故  
人害之家有不宜得之財或致盜竊故傷本也  
息壤地名非鯀之所竊與柳子之所記之謂也  
行百里者半九十余意謂人不能行百里僅可得行  
九十里者之半爾非行百里者止能五十里也  
積節謂方交好而又絕絕而復交故使節積滯也齊



新加德故韓魏東聽矣利千里者二謂楚兼擅越也  
支分方城以薄鄖楚強韓必從之故兵休復起足以  
傷秦也

母多疾到言多割則趙不聽必用兵而白起將或窮  
冉也母多而疾割則冉之功矣到或當爲割

威亦憚言秦之威力爲人所憚畏也

詳事不更不當爲下詳卽佯字言得地專利而佯爲  
事秦以休其力也

兩謂新城君韋前言能無議君於王則有議之者矣

下云不釋蹇是纏牽長言戎之不能薦已也觀兩言似乎戎寵之少衰矣吳謂不見寵衰之意未深究之耳若新城非戎則何在韓策

重任臣句言任臣者期以後必如前不敢反覆王豈可不重其進人意而輕之耶

處三分之一言太后穰侯華陽三分秦國而王止得一分也卽魯四外公室之謂

其主謀攻秦者固未可得與金而非主謀而可予金者與主謀者比肩事君猶之兄弟也一受金必撓其

主之者之計故不能三千金而士已相關矣兄弟下似無缺文

爲子至同也言已爲子時無地今失汝南乃與爲餘子時同故不憂此意甚明註謂雖亡其餘子如吳之亡子非是顯逆二字言韓削弱而公然逆秦奪應侯汝南地也爲汝南虜猶云韓虜謂應侯失地而不能復妄言不憂又欲委之敵以復之是猶爲韓虜之者耳卽左氏今子魯囚之謂

好戰則兵疲故戰事不斷而國危好殺則民怨故地

不爲有而權輕此卽不以善息之戒

白馬者人立之名耳大道無名故白馬爲非馬以此言則可通而不葛藤矣

裂地敗於齊謂秦取懷而齊將鮑佞退去不敢當是敗也下又言田單之名將亦不敢支秦明從不可成樂伐之下當有勸秦息兵之說而文不全

吳氏辨伐燕爲宣王事專主孟子以爲親見是矣然謂宣王克燕卽薨卻可疑孟子書始終皆云宣王若如吳氏言則燕人之畔乃在湣王時湣王非不聽孟子

謀衆置君之勸而取燕者何爲慙而陳賈何繇爲之  
解乎孟子又何不著潛而皆稱宜乎余意伐燕實潛  
王事史記爲得而孟子成書在去齊之後或不欲與  
潛之昏亂爲往來故追稱宜耳

伐魏不便數句直謂伐魏不便於齊下言刺已無益  
卽封已亦無損見已爲齊計之善而王不當以受璧  
馬之故疑已也下又言誠不便謂王自見其不便也  
分爲二段故人覺難解

無形者形所從生故曰君無端者事所從來故曰本

惟至聖與明學乃上見其原下通其流是以無不吉  
蓋以有無引下貴賤高下之說也

齊貌辨爲靖郭說齊王已云先王之廟在矣馮煖說  
孟嘗君又請立廟請祭器爲一窟何也豈其廟中廢  
歟此國策辨土之言所以不可盡據爲實也

蘇子留太子九可之說鮑氏謂薛公不聽而世猶傳  
其語殊得事情吳謂臆說殆未深考耳

勞之下數句言天下自勞亂而我自安靜故諸侯不  
謀我而國無憂非我國亂勞天下也

魯仲連射書聊城鮑氏謂後人擬作此亦一見但考之不精耳吳氏排鮑必辨攻聊之非田單又無燕將自殺單屠城事則亦過矣單雖相趙何妨復歸齊而爲將而云必不返齊何見而云也燕將取聊懼譏不歸此亦戰國時常事何以定其爲樂毅避譏之混也燕將自殺單乃克城時燕兵豈不與單戰單豈能無殺一人而云無屠城之事也且將不死聊不克則連爲無功死矣克矣單爲之叙功請封亦嘗禮耳何必辨哉至謂罷兵而去爲實此正爲說士所惑耳鮑謂

擬作見正在此殊覺有味吳氏排鮑遂成信集評而  
不信史之過

言其後卽所謂議其後也慮賢謂審其賢否也審之  
當在君不當在臣下也江乙實欲傾昭而云爾者不  
欲楚之疑其行譏也乙與奚恤無隙而必欲傾之盖  
魏人畏恤之威而乙爲魏間之於楚觀狐假之章可  
見矣及恤有近苦之言而取寶器之言進矣乙真小  
人哉

比周上危分爭上亦未安牛李爭而唐亂三黨起而



宋衰分爭之患不減比周矣然而兩端相因也不比周則無分爭有分爭則比周成矣

因鬼見帝蓋以諷楚君之不禮士也故楚王曰聞命具以沈尹戌爲莫敖大心非也戌爲司馬位在莫敖之上勃蘇包胥或聲近而訛新造以爲官無考以爲始構難於文不通此有缺文語字

管猶焚謂惑也好利故自可惑其心

効地出地之語蓋秦不欲齊楚合必如張儀之爲以効地也夫翠出楚地以取齊而鯉收秦地以取秦楚

必從鯉而翠事必敗矣

偏死如殺身成人之類偏生如避世離人之類故足以載大名無冠艾不足橫世卽遭蹶得便之謂

捐德絕命謂捐棄德化絕命者爭強而不顧天命也謀我言四國謀害已也非爲已謀也

蘇秦兩木之喻蓋以鉄銛然自入喻讒言易入於君心也出夫人言鉄之入木出於人爲非木屑之謂卒世不見鮑謂舉世不察似是若云沒世彼方啓土胡狄其事明彰豈得不見也定負遺俗定猶決也言

夫其負俗之慮則無庸顧天下之議也事出功止謂  
欲取胡地中山也當世輔謂見居此世則輔循其俗  
以歸於禮是古之道也嘗民數句學沈所聞而行之  
故能成其官之政民習其俗故能順上之治也服既  
好奇邪則心亦好奇邪邪行故志淫放也

無見醜與溺苦學相因言無以王子之愚陋爲醜而  
使之苦於誦習之事但當道之以行義足矣  
習本國之兵則不憚敵便本兵之用則不畏難故下  
言民便其用而王變之也非習敵人之兵也

周最厚秦而趙資以地而相之魏秦必疑最私於趙故與魏之合虛也最又厚齊故齊與魏合而勁也魏王不聽而不相最是輕齊故秦雖合而齊不合亦不能得趙也

如王二字當連下若用事趙之半爲一句言如令王若用也何不成文之有註失之謂知賢不如王乃不成文矣

兩地之時謂封奉陽及資襄安兩出地之時也註未安

過而遂正謂過稱王而稱帝以正於天下也註未妥  
親戚受封二句言旣以親戚故受封而又如國人以  
計功明其過於貪也

以趙之弱章乃勸橫之策也言趙用建信涉孟之讐  
疑作籌謂策也以爲從也然不能以無功害秦則不  
如出兵助秦攻魏又與楚分齊以分地自強也蓋從  
則無功而爲秦所惡分齊亡魏而得地則有功於國  
而又與秦善則趙楚君安論有功無功之爲智哉亦  
橫而已矣

申秦楚當作伸如註謂居二國之上也暴戾定言齊  
自以爲強橫定矣故楚必伐之也註失之  
少委謂少出地因行以和魏也

實作勸訓鮑註得之勸韓王近河外若欲與秦遇者  
故魏王恐而尚與秦遇遂斥楚而伐齊事不行也  
鄭疆出秦二句亦陳應之言言鄭疆曾稱已之智勸  
其父聽已之謀也

半塞謂群臣知伐國之不可而爲張儀巧詞所惑以  
塞其尚明之半是儀之劫王以從者繆群臣各失其

一半之明也非謂群臣有一半人之失也註皆未

股掌之臣言已之親臣無他過但以舉首不便而殺  
亾之何以自白於天下及群臣也中道謂行事之中  
非中立不可謂不可以兼利兩國則將利齊韓而不  
顧魏矣

首事言始謀舉事爲事首也註未安講攻二句蓋言  
秦楚主兵欲構兵於齊是弗救也按魏之和按如據  
案之案言且據有而待之如下文侯翟樓二人之事  
秦也

魏冉明熟是是字謂上剛柔皆用之術也明不與秦  
數語不可解註謂伐旣上不可何又伐也吳謂致死  
以鬪夫秦之奴虜使民者豈患其死鬪余意生當訓  
漸謂漸圖所以殘害秦者使秦皆不得以利害動已  
而已自安又無令天下得賣已以合秦是免患之計  
者也嗟乎此必六國皆然乃可行其如連鷄不共止  
何哉聽臣計以下卽生殘秦之說也兄弟婚姻言秦  
魏比鄰如之也

挾私參行言明王不挾已私意以爲政必參之衆論



而後行也精於此精當訓專不必攻一國是專合從也

樓梧言合秦魏而說者令魏擇有齊者相之蓋以間梧也固可可知非梧

食其蓋從茲公爲從者也客謂茲公不實爲期是茲公意欲倚爲從以陰合秦也故勸食其先合於秦而又言不合秦則爲漢者將借子之爲從以交秦是以食其之資資橫人也譬指橫人非秦也

肖請齊資之於魏是示無魏也齊資言於魏必去魏

之所任者乃可用肖是以無魏害有魏者齊必不爲也

或人之策欲事嫪毐可謂無策矣孔叢子以爲子順之言子順當此時固不能爲計然亦不肯爲此計也唐睢之存安陵說士誇張爲之辭耳鮑說亦得之專意於本國而不外黨人國此所以貴也故下文以黨爲自爲貴責魏齊之罪謂郝茂不得齊魏之罪卽後章謂郝茂不忠者也

不反魏謂不侵之以爲成而將西首事也所以不者

竟不西也。鮑說是絕地形下有缺文。或三字係錯簡。則呂說是從臣大臣二句一正一倒。說郝不事儀而儀不得議之。茂不事郝而郝不得議之。是不比周也。郝收齊韓而王不加貴郝。則大臣不得挾外爲重而輕本國也。攻敬當爲致敬。構當爲媾。言茂約結三國以親秦而攻宜陽王可無慮矣。而猶與茂盟以簡察之也。

中立猶云獨立言不借兵於秦也。歡勸二字有誤。攻齊攻字或當如原文作勁。是韓不動兵齊見秦韓不

攻已必力攻魏秦又聲言救魏以勁魏是齊魏離而秦重強者也故云此秦之大急也

揚河外謂求武遂而事秦不事楚楚將揚塵河外以伐韓也故下文勸說楚借之求武遂

恐楚之怒蓋以揚河外之說也不能獨立二句言韓之得衆者不能獨立爲相必求與楚與善而楚請相之乃相得也今楚欲相珉而得衆者不得相必惡珉珉爲楚必以國事楚此唐客蓋爲珉遊說者廣王見秦之大而重王也澤布謂有德於幾瑟害韓謂害公

叔之難幾瑟者

謂新城君章前後求質子只是爲韓求楚之質子耳  
楚聽之則挾韓以服齊楚不聽則怨結於韓必重新  
城以結秦好矣末又言楚聽之則德積於公叔伯嬰  
而韓以國事秦也又字衍來質恐結字傳寫誤

合於齊楚秦必委國余意秦當爲魏而在楚字上合  
於齊魏則伐楚之形成矣故楚委國以解伐是不中  
儀之故智也然而未嘗背秦故云猶不失秦

無先計謂不必計筭也爭機謂韓首事秦之機會秦

所爭趨者也

過謀猶云失計言不肯尊秦而爲之下如許異齊桓之爲而不爲是失計也

明不善於天下言不能容人而與天下之諸侯不相善也

桓公負婦人吳說謂好衣紫非是魯見書稱桓負婦人以見諸侯管子曰吾君有背疾不得婦人不愈此疾也則是實婦人矣豈紫衣哉鮑謂好內而霸是負謂立婦人於身後也

言三句言  
苟所附二句言必所負之國可重王乃可重之也下  
言齊強之難敵則燕當重之以謀矣故謂當出質而  
又事其左右以驕之也內寇不與二句言內無應我  
則我不可與強敵相拒也與謂應也下文治外敵其  
內是相應也

市被旣攻子之又死以殉國則攻太子平上有缺文  
當爲子之乃攻平也

先趨二句言先趨見士而後坐息先問請教而後默  
以受教也

因其強數句言因其強務廣地而益勸之逞強廣地則疲敝而可折缺之也

遁取秦句遁訓去言去取秦以謀害趙也

請告子以請齊子謂奉陽君守子以甲子謂蘇代言使奉陽請於齊果守趙質以甲必請守代以甲言害代也此上言奉陽怒代自告朱灌趙足言奉陽怒齊恃順趙之交齊恃順爲主也今順不可信故怒齊因倍之言燕當乘此機背齊而交構於趙也故云大紛之合苟可循二句合上當有不字循因也因不合而



紛爭也。若不因而紛爭，則齊趙合而皆委離間之罪於代矣。故云惡交分臣也。相効謂齊趙相與効力也。逃而去之，代詐以罪逃燕而去也。卽下奉陽之言怒王之，不以吾故以用也。吾蘇子也。子相子鄉子字似當作予爲勝。

犬馬而不言燕，謂王漏伐齊之言，使齊賤已如犬馬而不重燕也。

除患之遺，謂不除患而遺患以從事於救也。

論不脩心言論人者，責其不脩改其心，議不累物言。

議人者必自不累於物乃可二句言已與間皆有失也

新序劉向所著向以此王喜書爲惠王責毅書國策固向所輯錄者奚爲不序於前章之下也然則此書實王喜書而新序爲誤明矣此書之末出乘名又云二人則傳者及史之誤也

交而不脩言雖交好而不往來脩好之日已久也窮閭隘巷不容君之車與盖故君傾盖與車而朝其士也註未得

吳氏謂史文舛錯以致後人悞以刺俠累弑哀侯二  
事爲一事余意乃史文舛錯致後人悞以一事爲二  
事也夫俠累韓傀韓廙一人也韓嚴遂韓嚴嚴仲子  
一嚴遂也韓山堅陽堅一陽堅也獨烈侯哀侯乃二  
人而以韓策所言許異事度之當爲烈侯而云哀侯  
者蓋傳聶政之事者以韓君被刺爲可哀故稱之哀  
而不憶韓之自有哀侯也史遂以爲哀實被刺而書  
韓嚴弑君又遺遂字他書又書山堅弑君而誤不書  
陽字是史之舛以一爲二事而吳氏遂執之以成其

爲二事爾余辯取燕及遺樂簡書及田單取聊城及  
此事之以一事爲二後之人當有同余見者

讀書嚶語卷之十

馮翊李元吉父慶父著

上谷金毓峒稗鶴父較

史記

索隱以炎帝黃帝皆少典之子以爲少典國名也故相去五百餘年而同出少典也不思黃帝爲有熊國君之子則少典人名明矣四海九州之廣萬國億兆之衆五百餘年之久而國君前後同名何足辨也史叙世次多有可疑舜禹同出顓頊而舜至顓六世

言  
禹至二世夫以高辛七十年之間而世次不同如是  
何舜之先多夭壽如此也不特商周之世次如昔人  
所疑矣余意舜自虞君之胄禹自崇伯之後未必同  
出高陽氏爾

皇甫謐等記高辛三十三侵帝位七十年而崩壽百  
五歲而又以帝摯立九年遜位於堯堯以二十一卽  
位或云以十六卽位堯二十卽位則生以高辛九  
十四若十六則生以九十八矣何高辛生子之晚若  
是彼稷契其爲堯之兄乎弟乎度堯以百一十八歲

崩稷契皆已老不堪任事矣何以事舜教稼穡明人倫也余意稷契未必同出高辛氏爾

后稷至武王十六世所傳名蓋爲國君賢有聞者未必盡父子相繼也楊升菴考后稷之後有叔均叔均又數世始傳不窋第未見所考據之書也

武王斬紂或以復伯邑兄弟之讐沒冢書所說未必無據

三百六十夫不顯猶言豈不顯也言天始建殷以三百六十之賢大顯明之故雖屢衰而不卽擯滅以久

至於今我未知天定保位否而敢安然求寐乎必盡  
去紂惡大勞來西土使我事顯行德大彰明乃可卽  
安爾故下言卜居不求固亦恐天位未可定也

龍漦之說亦殊難解卽厲王以出奔之年發簠而童  
妾已亂遭之至二十而笄而孕則共和十四年也其  
生女也則宣王元年也宣王四十六年崩幽王三年  
乃見褒姒則已四十九歲矣色必衰矣何以動王而  
又何以生伯服也豈真有鷄皮三少之術乎

王義稱列女傳稱陶子五歲而佐禹註謂臯陶之子



伯益此不足信五歲之子安能佐禹治水乎按左氏  
臯陶乃高陽氏之裔子非高陽氏女之子也

飛廉石櫨事觀者不明史記之旨而以爲無此事非  
也夫廉爲紂作石櫨北方旣成反報而紂已亡僅於  
霍山爲坊而告棺成則廉所謂石櫨卽謂紂所作櫨  
爾以紂不及用而已得之如天賜之然故自爲銘云  
而死以之葬於霍山此自是實事何得云無也

正義論救亂不可日行千里以去周廬宿衛可矣然  
偃王未見必與楚文王同時且周之兵皆在國故亟

馳而歸以發兵救亂亦可也

正義稱丹犁降蜀相莊乃殺蜀侯并丹犁降秦可謂誤矣蜀侯卽公子通秦所封也相莊亦秦所用也何待相莊殺侯乃來降次年秦誅莊以殺蜀侯故耳

嚴君疾爲相疾卽樗里子也蓋武之三年疾出相韓至是復還爲相耳

少近官三郎無得立者少當如字三郎蓋郎中陞盾郎之類天子之近侍也言二世誅諸公子以罪過連逮之但有少親近郎官者卽以爲謀逆而誅之無得

立也

太史本紀亦有可議如秦本紀當與始皇紀合爲一紀分之則秦不可爲紀矣項羽不可爲紀以未爲天子也或爲義帝紀而以羽事爲之文則可蓋羽與漢皆義帝之臣則義帝實天下共主矣其以陳涉爲世家又失矣涉崛起而不及世何以稱世家哉搏牛之蝱二句鄒氏說是言我方圖破秦不肯與章邯爭戰如蝱之搏牛者不破牛身之蝱蟻也

史不作孝惠紀此是大訛謬處豈有享國七年之君

而附於一母后之理當以吕后紀爲孝惠紀以吕后事附紀爲是或另立吕后紀猶之可也

陰安侯未見傳大較蘇林說近是如淳以爲劉仲妻封陰安若然者旣列陰安矣又云列侯何哉

史記禮樂書俱稱缺而褚少孫補之者然觀其首一段皆太史文非褚補者蓋禮書未成之書也樂書自誹謗當族下其文未終蓋佚之也

律書方言律而卽以兵繼之漢初作文往往如是不爲異第有德君子下繼以七政二十八舍一語下又

云律曆天所以通五行云云者似乎有缺文少源委矣自不周風以下至篇終則律書備矣至末太史公曰以下似非本文

未能詹也詹當訓見言未明見也至太初元年則已明見矣故正曆改元也

月名畢聚註謂聚爲姬訾之訾失之矣姬訾正月也此十一月得甲子以爾雅當爲畢辜或太史公以爲聚爾澤搏密言雖以五色占雲而又須潤澤搏聚密此方可占也

水澹二句言水之澹澹渙散乃澤將竭故地漸出而見此象者也

先後宛若先後二字今俗語猶然但呼先爲去音而後爲平音耳

黃鍾史寬舒黃鍾蓋地名其地之史則寬舒也實一人以爲二誤

少翁致魂以王夫人爲是李夫人得寵在太初中爾時少翁之誅久矣又封禪書前稱少君而此云少翁爲文成將軍則是二人也而後世多傳爲一人未知

何考

稍入蓋收草以供食者非稍少其稅也

吾山平但言取山以塞決而山以平非魚山也鉅野  
溢但言大地皆水溢耳非河灌鉅野澤也

楊可告緡錢縱謂前令民自實緡錢而法縱弛民皆  
隱匿也非縱令告緡也

擅賦法謂縣但以訾給役取不乏事而不敢專賦歛  
於民恐爲大農所劾治也

馬齒長謂馬則故馬但年長非昔日之壯駒耳所以

復外廡之言未必戲荀息也

犁二十五年犁當爲發言已獨處如寡婦居二十五年也亦或本如左氏作我字非比也

言何以易似謂重耳所言避三舍無可易者言晉無以報已只有此一事耳非謂言之輕出也

河曲之戰晉以趙穿輕出故無功而此云最有功誤也

有如病不宿言有此金如有病不可宿留故誠以復歸勿動也



史載齊說越伐楚之文其起處無原頭疑太史公失錄也至如越王答齊使之言益與越伐楚無涉且願魏聚兵大梁可矣方伐齊而曰願齊聚兵南陽以牽制楚越豈以齊不從其計而伐之乎  
目論二字卽察毫毛而不見聽之論也

越通無假之闕此闕蓋楚都之要地故得此闕而四邑不貢事於郢上文至無假闕三千餘里言楚兵北出路遠倉卒不能旋師以救國也

韓世家稱聶政以烈侯三年刺俠累經十三年及文

侯十年哀侯六年凡二十六年而韓嚴遂弑哀侯刺  
客傳聶政而嚴仲子刺俠累稱俠累君之季父則是  
累卽韓傀一人也仲子卽嚴遂一人也戰國策又稱  
政刺傀而兼中哀侯則是一事也而年次不同如此  
大都奇事傳聞不同故至是耳

戰國策又稱嚴氏爲賊陽堅類焉則竹書紀年所謂  
韓山堅卽陽堅之訛耳

公叔韓相伯嬰韓太子二人也索隱註似以爲一人  
未是

大車不較謂脩理其敝壞損動之處琴瑟不較謂整治其絲微之用非止謂較量也

祭北祭西蓋致助祭之禮自西與北門來也非二國祭齊城門也

鄒忌得全膏豨二應殊覺未全蓋人臣不離君前豈便能得君而謹事左右則威王方烹左右之魯人者豈左右能使君爲方穿哉若云無離前務盡臣道若云謹左右執事將順匡救則可矣

臣訓大嫂則丘亦當如臣訓或以爲姓或以爲空俱

未是

質有其內質實也謂內實有其德也

事發相重謂呂氏藉劉澤封王以自安爲相引

重也

楚唯無強數謂惟無強於楚者若立六國又將撓屈而從楚矣蓋漢不強於楚則六國將惟強是從故撓而從楚也是謂欲撓楚而反撓以從楚則將何以成功乎

留侯招四皓或以爲非真四皓但令人習爲之如優孟學叔敖也亦一奇說但觀其說建成侯令太子不

將兵而東亦有高識或真四人來也

魁梧奇偉魁大也梧卽梧桐其木挺直而長言其當  
爲魁大脩長奇偉之士而今乃如好女子婦人是人  
固不可以貌相定之也

美如冠玉冠當訓加言平之美如加之以玉潔白可  
稱也未可以爲冠上飾以玉也

不足君所謂此非不滿君之願欲乎意不爲失箸蓋  
見亞夫之不平而疑其心有怨望也其所以笑者所  
謂嘻笑之怒甚於裂眦矣故下有怏怏非少主臣之

言

爲無訾省言若無訾財者而不復省視故下云府庫  
敝漏盡腐財物不收徙是也

伯夷傳殊不易觀其如稱許繇諸人本前載籍極博  
來然虞夏之文可知而許繇諸人六經不概見則其  
聲施後世不若夷齊矣以孔子不稱也况夫岩穴之  
士不見知於人者寧望夷齊哉所以深明夷齊之榮  
得遇夫子之稱也至夷齊之傳或以爲全作怨詞是  
不然夷齊旣以諫伐耻食周粟以死其歌三命之衆

矣是已安之若命矣何以爲怨其曰怨耶非耶猶云  
是豈怨者耶言不怨也天道無親以下是太史自論  
天道之不盡如嘗言蓋以膏自傷之意而末云得夫  
子名益彰益見夷齊雖窮可以無怨也

其重輕二句謂豈其所重在富樂而所輕在貧約哉  
言重輕不在此則夷齊爲重而蹠等輕矣

衡命謂不從君命而行已之志也或作權衡說太深  
矣

或謂太史論晏子哭莊公爲責其無勇非也太史明

以哭尸成禮爲晏子之勇其責不討賊哉

重射以重物爲賭射也第但也非且也及臨質謂要約定所非對也

解雜亂數語謂不控人之拳不搏人之相戢而但批其亢卽所謂揜其吭者也擣其虛卽乘虛不備之謂夫批亢擣虛則亂者闔者將備我之批擣而亂闔可止是謂以形格之以勢禁之令自解也

魯人惡吳起當在魯君前不然魯君無繇遽疑之也其以事魯君魯君疑之二魯字史中多有此失乃是



太史公信乎揮來未及細剛去耳

吳起破千金之產似乎非貪殺齊人之女似乎非好色而李克云爾者蓋意在尊官顯榮則厚利隨之矣既得厚祿則妻妾之奉不俟言矣是故凡起之爲廉者乃起之爲大貪也李克之評不誣

公叔逐吳起之計頗未解韓魏同姓而韓公叔尚魏公主未解一延吳起以公主則公主何爲賤公叔未解二豈公叔以其所尚主委之起耶抑公叔以其相印授之起耶若以相印授起則公主輕不魏相者爾

起方相何嫌於公主而辭未解三若以公叔所尚而委之起則公叔不復可稱人矣乃武侯反疑起何哉未解四也

左建外易左音佐謂內則左音以立已之威於外則易其所言以謾人也註譌之左道非也

微哉謂秦之所以收錄商君者其禍當不小謂其大也非微與顯之謂

六國從親以賓秦實當爲賓訓言斥逐秦而不通之也非以爲賓也

秦兵不出函谷十五年此叙蘇秦事者之矜詞耳按  
史傳不二年而秦使公孫衍欺齊魏以伐趙以敗從  
約矣安得有十五年無兵事哉或謂反使秦人得養  
其全力以成帝業何不察之甚也自惠武昭以後兵  
爭者且數十百年而始皇始并天下豈在得此二三  
年養兵之力哉

蘇秦以秦恐齊而爲燕復十城或以爲秦方爲合從  
以損秦而反以秦恐齊使齊以此詰問之何施面目  
哉是不然秦以六國損秦則秦無奈齊何今齊取燕

城而燕且率秦以攻齊則秦有以病齊矣夫豈謂秦之遂弱終不能爲六國患哉

不死殊而走益以五字爲句言不至死殊而賊已走也或以爲秦以成死創故云殊而走夫殊乃斷首之謂豈止成死創而可言殊耶

以餘兵南舉大宋蓋預言之未卽舉也且當噲任子之之時則噲之末年齊已有舉宋之勢也

激怒張儀入之秦夫蘇秦欲用張儀則當禮用資遣之何必激怒之也激之怒故張儀遂與秦反而從不

能久矣使秦以誠用儀儀得用於秦必不至如彼相傾也

在吾術而不悟蓋儀已料秦或使人供已車馬金錢也而不能卻而不用故云不悟

善爲之計以下數語或未必對王語而史氏所增也若實對王語而不用則愚甚矣

兩手捧頤何以爲貫蓋人之奮戟者一手前一手後則戟挾於頤之下若貫之者然耳

燒掇焚杆方言燒焚何言馬箠糞箕余意掇取之也

言一曰  
杆疑作朽謂平墁之也

自爲責謂人言楚反覆好變而向壽以爲亡脫楚有變是向壽自任其責也故下文勸壽謀楚之變

內行章義之難疑當如國策作句章昧之難盖句章與昧皆地名或楚所敗越之處言滑不賢而亂越故楚得入其內而有句章與昧之勝也

瞿然顧化瞿驚懼之貌言乍見其術皆驚懼而指顧之間心爲之變化也

其言不軌軌謂先王之正道轍迹也言衍之術雖不

合先王之軌迹而亦有飯牛負鼎之意耳

爲堅白之辨者非孔子弟子此公孫龍乃與孔穿同時去孔子時五百六十年矣

孟嘗君之入秦也微鷄鳴狗盜之夫幾不免於虎口爲土偶人所笑矣其始之往何不思昔者土梗與桃梗之喻乎

孟嘗之伐秦也始以報怨而又繼以貪利無惑乎功之不成也收河東三城以和亦幸矣

厚行謂周最原與齊厚見逐而我又收之是行厚道

也反齊王之信謂齊方信祝弗等而我收最是反王之所信也禁變謂齊與秦合則從事壞而孟嘗之所爲變矣今收周最而離齊秦所以禁其變也

太史載馮驩事不錄孟嘗之周驩母及驩自署能收債及問市義數段不若國策之圖融矣

侯生自剄意以自比於從公子而戰死耳然生始謀殺晉鄙公子爲之垂泣則生之自剄據殺人原謀爲首則生固首謀以死抵晉鄙亦可耳

豪舉謂平原但以已富豪舉事收召游客爲名耳非



於豪者則舉之也平原門下客有一毛遂而不能知其才也信乎其徒爲豪舉矣

威亦單單當作憚訓言人所憚也不得作盡訓以上文功多例觀之可見

范睢親中國之說非止欲與之相親也實欲臣服之以爲已有也卽上文所謂近攻是也故設三事言卑詞厚幣以事之則魏未必從割地以賂之魏固從而昭主不爲也故兩言不可乃終曰舉兵伐之是謂近攻是謂親中國矣高諸未是後又言收韓亦親魏之

說也

弊御於諸侯非斷制諸侯之謂言戰勝攻取利賂歸於陶而疲弊則穰侯盡以歸之諸屬邑縣也諸侯謂縣邑之長御當作及或遍訓之爲是

射王股因此時稱王而隨口言之耳非誤

睚眦皆從目而註謂嗔怒見齒失之矣此正如今人所云睚眦

史叙虞鄉急魏齊事於昭四十二年而昭四十八年長平捷後虞鄉尚爲趙畫和齊之策使秦使先來趙

約和則四十二年虞鄉未嘗去趙也去趙當在四十  
八九年也

刺齒肥謂肥肉刺之齒間也何必作醬

樂乘先爲趙將久矣破栗腹時樂乘別將破禽慶秦  
此三禽栗腹樂乘誤又後復云樂乘廉頗圍燕皆史  
文重疊之失

設九賓賓卽儼字謂傳命之儼相當有九人註謂九  
儀九服九宰皆失之

耶鄆二字當屬上文胥後令一句言待後令於耶鄆

也

肆然謂公然爲帝也過謂過諸侯之位而爲天也  
五刺客曹沫事不見左傳或未必有其敢行不反顧  
者專諸聶政二人足稱豫讓未可以刺客目其舉動  
亦與刺客未似若荆軻則又不及格矣

視肉按山海經有視肉之說謂無人形而但有肉能  
視也與此或不同

昔人去幾意凡人之舉動所以胥待人者謂其幾未  
到去之尙遠故胥之故下言成大功者在因瑕瑕卽

所謂幾之可乘者也。忍謂急乘之也。故下又云急而不急就爲失。

李斯既知物禁大盛又慮物極則衰未知稅駕則何不思所以稅駕者而戀戀不已遂聽趙高之計以求久其富貴也。唐楊國忠亦云吾未知稅駕之所但且極樂耳。小人之態每如此。

趙高倡立胡亥之計亥與李斯始皆不敢從而後皆汨於利而從之。此殆天以趙高亡秦也。非高之邪謀而扶蘇立蒙氏輔之或猶可存乎。

避死庶幾謂不貪生求利也勤勞見危不以勞事爲  
勤而避之以致受危也猶人安足謀謂行此廢立之  
事必有過人之才乃能爲之計安我僅猶人耳安能  
爲此計也不死安託命謂已旣不能以死守節舍從  
亥將何所託命哉許詞也少我國我謂以我所行爲  
不滿其欲乎且欲固執以求我哉言李斯不滿其望  
也故趙高卽應曰如此殆矣

蒙氏世將按秦昭二十三年蒙武爲將伐齊計其年  
少亦須二十許則其父驚計可四十餘矣至莊襄元

年則騫幾八十矣始爲秦將伐韓始皇二十三年  
令蒙恬同李信伐楚矣是時蒙武亦且八十矣乃又  
使同王翦伐楚而不用恬也豈蒙世爲秦將之太公  
望歟不可解也

史以吳淝淮南厲王皆作傳亦失之當以淝附楚元  
王世家厲王附悼惠王世家各自爲世家方是  
史不爲吳芮作世家又不立傳皆失之後人謂與張  
耳當爲世家良是

望臣深望謂怨之重去將言以去將爲重事而不肯

也望張耳不讓亦怨之也雅游人多爲之言作一句讀則甚明言舊所與游之人多爲之稱譽也

不侵爲然諾言一有諾許必不負之是不侵也

豈顧問哉謂其相許以死不待再相顧問之也

史贊魏豹彭越謂喋血乘勝日有聞豹不足語此惟越撓楚有功可稱耳其謂得尺寸柄雲蒸龍變等言豈真以越之願處昌邑爲欲反哉

俳笑之俳當作非或作排謂以刑故排以言狂放也笑之也非俳優之謂也



史贊英有罪其首虐多殺是矣而自起多殺之甚乃無一言罪之豈以起臨死一言已自明耶

啗啞叱咤啗啞聲之未出口也叱咤則出大聲以喝人也自廢自失也如樓煩欲射而目不敢視弓不敢發也

廣武君策誠善但信能知策之不用豈不能知其策之用耶知其用則行山之路亦多矣豈不能出他道以襲邯鄲如夏陽之故智也

褸衣耳食傾耳待命謂恐軍來不能自免故飽食着

衣以待死命也

淮陰失位不能無快望心當時天下初定人心未洽或有以蒯徹之說教信者亦未可知其與陳豨密謀似乎理亦有之舍人上變固亦未必無因也高皇大度幸赧蒯徹究而論之殊當烹也

陳平謂胡者全兵恐有誤字缺文當言其無全兵爲是晁錯所謂木薦不能支是也

漢之初興戰國餘習未忘人各有心故以盧綰之被親一聞賊衍之言卽懷疑貳之慮固高皇之不推誠

有以啓之亦時人之心未洽故然也繇是觀之豨信之事殆亦有自來矣

樊噲賜重封而不言何封酈商傳再言賜爵信成君豈噲之重封亦如商再賜賢成君也

前拒拒陳之名左傳固云偏爲前拒是也

賣交言見利而負其交友是賣之也

人告高祖謂告之於官也告不傷嬰謂高祖訴告原不傷夏侯嬰而嬰爲證之也

緒正律曆緒端緒也言理正律曆有端緒也故後云

卒就則律曆皆成也律謂樂律下文吹律是也比定律令此則法律也非樂也又下及百工程品皆以漸就成也

落魄或作落薄落度落托捏齷或作醒齷並同今時人猶作此等語

據陸賈五子則一歲過其子家者且七過有餘日矣而云歲不過再三豈賈亦自有另居而有時不就其五子家食時乎其云數見不鮮無久恩語則升庵言之是矣

陸賈入座陳平不時見始觀他書以爲平對面不見賈也今觀史乃賈入客位坐而平久之方見耳

厲王殺辟陽而文帝欲治平原君可謂誤矣而平原遂自刎何也無乃平原耻其與辟陽交而今厲王以椎椎殺之歟

攻苦食啖攻苦謂用力於受勤苦也不可訓擊啖自當作淡或古字借用若以爲無菜爲啖則有菜將不啖之乎招權顧金錢招指也顧受也謂指貴權以受人金錢如今語所謂指官驅騙者是也

兩賢相厄謂丁公與已爲兩賢人柰何相困厄也  
日飲毋何謂但飲酒毋効治其作姦犯法者何誰何  
也詰其何人爲之也

何自爲郎謂何時爲郎耳非謂自己爲郎郎官豈自  
已所得爲耶

百金之士謂以百金募敢死之士也士何以直百金  
乎

相提而論謂兩手分提而較其輕重也其意謂帝雖  
有失而魏其不當明揚其失也

沾沾自喜沾沾喜容之意也自喜謂自以爲是而喜見於容色耳

蚡謂諸郎言始爲郎耳非以年少者稱爲鄉也

生貴甚謂自生心作尊貴之度甚也卽下文痛折諸侯王以禮節是也下折節節疑衍

引繩批根言魏其結納灌夫後盡退去其前趨附之人如引繩而批草木並就其根下去之也

相爲引重言魏其引灌夫以自重灌亦引魏其以交列侯宗室爲自重也

武安詆魏其幸天下有變而魏其不發武安受淮南  
金事豈其未知耶

能爲石人等語謂帝不能長存今在已錄錄不向帝  
外家則百歲後寧可信不魚肉外家也

太史引春秋隱桓多章定哀多微詞是自謂不直言  
時事之意矣若其諂納其說以便徧指等數卻明言  
武帝與時臣之失非微詞矣

度漠輕留總謂漢兵不能度幕北而輕易留駐耳非  
匈奴之留亦非漢兵之輕入也蓋度幕則已入矣



爲將如此蓋太史不滿衛霍之詞非其不能薦達賢士也非與其善保功名也

比親附也言晏子下比於民正以自譽已能下拊百姓而上不僭君耳

相疑而外市言百姓既離心則將吏且疑朝廷罪及已而外交敵以自全也

人臣之利二語謂立功取官爵乃人臣之利而疲敝中國固非天下之長策也其云外郡外城數十以下段語殊不明豈卽主父偃所云將疑而外市之乎

介使者權介嘗訓假卽下文激怒使者意是也欲假托使者之怒權以誅呂嘉也

御輅之變謂中道而馳時或有馬脫御車遇輅以致傾倒之患註止明輅字而於正意未明

末光絕炎謂使群臣得藉日月之末光與將絕之炎以成其事業而正義餘文以成一經也非絕明之

炎

男子所死一言謂反之一言也謂反則必死之罪然如吳之失計則死我先塞成臯當不至死也

史循吏傳子產當與管晏另爲列傳而石奮之事似

可稱孝子未可爲循吏也又吳公治平第一而不入傳何也

吾言云云卽汲黯所謂內多欲者也非欲施仁義也張晏失之矣

非苦二句謂湯旣非苦節以就其賢行又不放循法令明白

分析已就其功能而乃取高皇約法紛更之以行其舞文私意將以此無種也

狗馬病力不任郡事力字屬下句讀明白易曉病字

言三  
爲句是

酷吏傳首郅都按都直而忠特以嚴被禍此亦可歎也都非可與張湯諸人爲侶者也

乾沒猶今人所謂白賴人物也旣得乃與田甲等交私覓利者耳

上所是數語謂旣爲上分別其引古義之原得上之是卽著爲決法絜令以揚主明所謂後主所是疏爲令也

升菴謂匈奴斬狄山未必匈奴之爲是不然山不能

言天子不與和而使一臣守陲間將何以禦虜亦可謂愚矣斬者實匈奴爲之特湯與上合意而山被其禍故郡臣震懼畏湯耳

義縱謂楊可爲亂民而捕其使縱無一可取獨此事則是

義縱王溫舒少時攻剽椎埋爲盜固宜其敢酷暴如此不知當時何以推擇爲吏也

張湯杜周皆希上意而爲寬刻此所保全其富貴也張湯以知當爲句陰陽人主與上下爲句言能以其

知術或陰順主意或陽順主意與主俱爲上下輕重也若以陽爲句人主六字爲句句雖奇而難解矣張謐鑒空猶云指空而開通之耳註真以爲開鑒而通其路失之

人人有言輕重謂漢使所言輕重不一致外國不信而厭之也服言是如說失之

進熟當如音義解其熟言卽六文善馬在貳師城是也

名一錢謂錢皆被浸入不得一錢在手名爲已也

錢也

仁寵最爲句過庸不乃甚篤爲句言周仁寵最甚但遇於庸愚無乃甚篤乎

楚莊在齊威之前且二百餘年而滑稽傳稱淳於髡之後百餘年有優孟此太史不考之失

方朔辨騶牙固幸中然而宮中後闔重欄中何得有此物豈非有人驅致之耶不然則野獸入宮固亦不祥之兆矣說者解詩騶虞率以此騶牙爲左驗然不知彼自詠六騶御與虞人耳與此殊不涉也

西門豹止河伯娶婦事觀之快人意而或謂之術而

永仁曷不思彼三老與巫者所殺女子之含冤乎

季主傳云代王之入任於卜者又云大卜之起繇漢興有或以爲不待文帝而已先有此誤會文意矣卜自古有之而文帝以卜吉入卽位故大卜遂興此亦太史倒用文法耳

季主傳文昔人謂非褚所能辨蓋卜者家所傳董氏之說得之矣

龜策傳前太史公曰以下文字細詳覺非司馬之文當亦褚生補作之其云三王不同龜數語則太史公



語也

太史公作貨殖傳而首以老子之言繼曰必用此云云余意輓當如字解不得作晚訓也言以此輓近世塗其趨利耳目則幾無五行者然民生有欲故曰雖戶說以眇論不能化眇論卽老子所言是矣言老子之言不能行於近世也

千乘三五語固太史公有激之言然亦指太公管仲句踐范蠡諸人之求富其國而言也

無岩處數語謂果有奇行而語仁義甘貧賤則可耳

無奇行而慕効之是可羞也

讀書藝語終